



Samoa nung ato kilonser tetsür
mezüngbuba shimogo

Mamata-i Angh melener; PM
aser tir dangi shiti zülü

VOL. XVIII NO. 214 (ADOK 214) DIMAPUR

RASEMNÜ (WEDNESDAY)

MONUPII (MAY) 19, 2021

₹ 5.00

Himanta Sarma-i Naga yimten tebilemstü atema maneni yaritsü imlar: TR Zeliang



TR Zeliang-i Assam Chief Minister Himanta Biswa Sarma den
ajurutepa yangi noksa nung angur.

Guwahati, May 18, 2021 (Agencies): Taoba Nagaland chief minister aser NPF lenir TR Zeliang-i Assam Chief Minister Himanta Biswa Sarma den ajurutepa senden ka amen.

Assam CM Himanta-i Naga yimten tebilemstü angateteptsü atema teyariteper tajung ka ama maneni inyaksü imlar, ta TR Zeliang-i senden nung ashi.

Assam CM Dr. Himanta Biswa Sarma ya Northeast Democratic Alliance (NEDA) nunga convenor lir aser pai Naga yimjung maparen nung shilem

agia arur.

Guwahati nung Assam Chief Minister tasen Himanta Biswa Sarma den ajurutep, ta TR Zeliang-i Twitter nung metetdaksü.

"Assam CM tasen Himanta den ajurutep aser election nung takok anguba den state nung CM tebilemstü khuret agizüka inyakba atema tenüngsang agütsü. CM makümdang aser akümba sülen COVID19 anema mapa tajung inyakba atema pa nem tenüngsang agütsü" ta TR Zeliang-i ashi.

COVID-19 Nagaland: Nisung 365 dak putet; 12 asü

Kohima, May 18, 2021(TYO): Mongulbarnü Nagaland nung nisung 365 dak COVID-19 aliba putet aser parnok züngsema nisung ajak agi 18,714 kümogo.

"Tanü nisung 365 dak COVID-19 putet. Parnokji Dimapur nung 195, Kohima nung 108, Zunheboto nung 13, Phek nung 12, Longleng nung 11, Mokokchung nung 10, Peren nung 8, Mon nung 4, Kiphire nung 2 aser Tuensang o Wokha nung kaka (1) lir" ta Health & Family Minister, S Pangnyu Phom-i metetdaksü.

"Maneni, tanü COVID-19 puteta alir nisung 192 taneptsü angu. Parnokji Dimapur nung 99, Kohima nung 78, Mon nung 7, Peren nung 4, Longleng nung 3 aser Kiphire nung 1 lir," ta paisa ashi.

May 13, 2021 nü nisung 366 dak timtiba putetba sülen tanü nsug 365 dak putetogo.

Nisung 18,714 rongnungi

13,491 taneptsü nguogo aser tang 4,407 anepaludar, ta Minister Pangnyu-i ashi.

Tanü COVID-19 puteta alir nisung 12 asüba züngsema tasür ajak agi 228 kümogo. Ajisüaka, nisung 11 bo tanga timtem ajanga asü, ta paisa shisem.

"Hombatashi nung Nagaland nung nisung 1,90,327 nem Covid vaccine indang dose 2,44,168 agütsü" ta State Immunization Officer Dr Ritu Thurr-ia metetdaksü.

Vaccine agirtemji frontline workers 55,257, healthcare workers 15,261 aser arishi küm 45 ser temapur 1,16,780 lir, ta paisa ashi.

"Vaccine agirtem rongnungi nisung 53,839-i vaccine indang dose anaprong agiogo. Parnokji frontline workers 27,834, healthcare workers 10,156 aser arishi küm 45 ser temapur 15,849 lir" ta Dr Thurr-isa metetdaksü.

India nung tanurtem atema vaccine tendangtsü

New Delhi, May 18, 2021 (Agencies): Arishi küm 2 nungi 18 tsüngda alirtem asoshi Covaxin indang Phase II/III clinical trials hopta ana tsüngda tenzüksü, ta NITI Aayog züngsem VK Paul-i metetdaksü.

Iba ya May 11 nü Subject Expert Committee (SEC) (COVID-19) nung benoka jembio go ta Health Ministry-i taoba hopta metetdakja liasü aser May 13 nü India sorkari arishi küm 2-18 atema tendangtsü temelaba agütsü.

"Drugs Controller General of India (DCGI)-i arishi küm 2 nungi 18 tsüngda atema COVAXIN indang Phase II/III clinical trials agütsü melaogo.

Taruba anogo 10-12 tsüngda iba mapa tenzüksü" ta Dr VK Paul-i ashi.

Tesem balala nung nisung 525 dak iba mozü tendangtsü.

Tang India nung COVID-19 anema vaccine agütsüba nung Covaxin den Covishield amshir.

Linük aikati tanur nem vaccine agütsü atema temelaba magütsü lir.

Taoba hopta United States (US)-i Pfizer aser BioNTech indang COVID-19 vaccine arishi küm 12 nungi 15 tsüngda tanur asoshi amshitsü melaogo.

Canada-ia arishi küm 12 ser temapur dak Pfizer-BioNTech vaccine amshitsü molunga agizükogo.

CM Rio-i COVID-19 wara anema longjemer raratsü ayongzük Tensa tajungba mekümra maneni lockdown asütsü akok

Kohima, May 18, 2021 (TYO): Linük aser Nagaland nung COVID-19 wara tanabuba agi tonger timtemer aser iba ama mapang ka nung asenok ajak külemi longjemer wara anema raratsüla, ta Nagaland Chief Minister Neiphiu Rio-i ayongzük.

COVID-19 azüoktsü atema state ajunga total lockdown tenzüker anogo pezübuba nung CM Rio-i "Nagaland nung wara tanabuba tongogo aser anogoshia nisung timba dak puteter aser aika iba tashidak ajanga süogo" ta ashi.

"Sorkari akokba tashi senotem kümzüka ayutsü aser anepalutsü meranger. Tesüiba mapang Nagaland health care infrastructure meperi liasü saka sorkari health care facilities aika tajungba kümdar aser tashi itshia arudar" ta paisa metetdaksü.

India sorkar aser temeimertemi Nagaland nung health facilities tajungba kümdaktsütsü aser tasen yanglutsü yaritepba atema kanga pelar, ta CM Rio-isa ashi.

Dimapur district nung yipden 176 aliba COVID-19 hospital ka kobi melii lapoktsü aser sorkarisa COVID-19 vaccination drive

tuluba inyaksü atema inyakdar, ta paisa shisem.

"Nagaland state nung alirtem tenüng nung arogotem, Kin Hohotem, political party tem aser NGOs ajak külemi longjemer inyaksü ayongzük" ta Nagaland CM-i ashi.

"Frontline workers aser talisa healthcare workers-i nisungtem kümzüka ayutsü atema anüngdang-aonung tebandang melii inyakba atema tenüngsang agütsür. Sorkar aser nija mozü kitemi mapa tajung inyaker aser tezü metangi külem sensotem tajungtiba nung anepalutsü ayongzük" ta paisa shisem.

"Asenok tang ya total lockdown nung lir aser iba ajanga tetsükdaktsü aika ajurur. Tensa agi nüngdakra ano lockdown atsülangtsü akok, anungji asenoki iba atemaji renema alitsüla" ta CM Rio-i metetdaksü.

"Asenoki iba wara yimtsüngtem dangi meyoktsü atema kanga kümdangtsüla kechiyong ibaji atalokra, takoksa ulura ajurutsü. Tarutsü hopta aser itatem nung tayongzükba tuluba ajurutsü akok saka asenok ajak külemi longjema lir"

ta paisa shisem.

"Senso ajak Team Nagaland nung züngsem kaka lir aser Naga kibong ka ama asenoki iba rara nung takok angutsü. Nisung ajaki amalitepba aser Tsüngrem tawabangba kübok Nagaland-i iba tayongzükba ajangtetsü aser tashi taitba akümtsü" ta Chief Minister Rio-isa ayongzük.

Mongulbarnü CM Rio-i aniba High Powered Committee (HPC) on COVID-19 Nagaland senden ka amendang district ajak nung COVID-19 dak sendakba tebilemstütem benoka lemsatepogo.

COVID-19 atema Government spokesperson aser Minister Neiba Kronu-i ashiba agi, district shia nung nüngdakbatem atema DTF aser War Room amalitepa inyaka aotsü.

"DTF temi senotsü nüngdaka agütsüba shiditem agizükogo aser nüngdakba ama agütsütsü. Sorkar jungjunga tenük yokdar aser district shia nung nüngdakbatem peritsütsü meranga arur. Tang tashi nung district ajak nung essential commodities peria dang lir" ta Minister Kronu-isa metetdaksü.

Kohima nung Covid-19 atema MLA temi ayongzük

Dimapur, May 18, 2021 (TYO): Kohima district atema Minister-in-charge Tongpang Ozukum den Advisor Medo Yhokha nati yashi Kohima district nung lockdown maparen repringshimsü atema District Task Force den senden ka menogo.

"Nagaland kübok tesem balala nung tapi agi tendangdang nisung aika dak COVID-19 aliba putetba agi total lockdown alitsüsa aküm. Anungji Kohima DTF tenüng nung nübortemi teti SOPs sülen anidaksü mepishir" ta PWD (Housing and Mechanical) Minister, Tongpang-i metetdaksü.

Bangdak ketdangsurtem dang nungi temelaba meshir DTF-i lockdown mapang non-essential commodities indang home delivery services shibangtsüogo, ta paisa ashi.

"COVID-19 anema rara nung asenok külemi longjemer noktaksüla. Frontline workers-i anüngdang-aonung mebendangi bendanga agüja inyaker anungji public-i tebilemstü khuret abentsüla aser akokba tashi department balala aser sorkar den yariteptsüla" ta Minister Tongpang-isa metetdaksü.

Meriema Covid Hospital aser Covid Care Centre Meriema nung yipden 80% jungnüa nung shirangertem mongdar. Anungji iba atema Kohima DTF-i bangdakpurtem dang Covid Hospital tasen ka lapoktsü atema

shio go, ta paisa shisem.

"Anogo tenet tashi kidang dang amongtsübaji tezütangtsüka aser tongtipang mapa aika meinyakteter. Asenok kidang dang amongba agi aika akoksar saka iba ya meimchir taküm kümzüka ayutsü atema lir anungji kangasa tongtipang. Iba wara ajanga asenok nem temang anema ayutsü aser taküm mesamatsü indang sayur" ta Tongpang-isa ashi.

Technical Education & Election Advisor, Medo Yhokha-ia "nisung aika dak COVID putetba ajanga Medical aser District Administration asoshi khuret tulu bentsür aruogo saka nenok iba wara ajanga bener arutsüba tayongzükbatem kottetsüsa akangshitsüla" ta ayongzük.

Sorkari lockdown ozüng agüjaka public-i junga manidaker anungji yamai dang ora, DTF-i nisung takümtem kümzüksü atema inyakyim akangshitsüsa akümtsü, ta paisa ashi.

"Tawa tesem balala nung tapi agi tendangdang nisung aika dak Covid aliba puteter aser iba ya taoksatsüka lir. Anungji yamai dang putetba Kohima district nung lockdowns takangba alitsüsa akümtsü" ta Advisor Medo-isa shisem.

"State sorkari nübortem nem teimla aser tetuyuba agütsütsü atema akokba tashi rongsen endokba meranga inyaker.

Ajisüaka, loktiliba aser kijatemi külemi sorkar den amteper manidakra, sorkari inyakba mapa ajak amajok asütsü aser nisung takümtema samatsü" ta paisa metetdaksü.

"Social media nung COVID-19 indang osang tai prokshiba nung mamangtsüla saka tebilemstü khuret bena inyakyim sülen anidaksüla. Iba ama tensa nung asenok ajak longjemer noktaksüla" ta Medo-isa ayongzük.

TAPIAGITENDANGDANG NISUNGA AKA DAK COVID-19 PUTET:

Kohima DTF-i Kohima nung Covid prokshiba metetsü atema tesem balala nungi tapi agi sample bendena Covid tendanga arur.

Mongulbarnü Chief medical officer Dr. Vezokholu Theyo-i anir district administration, police, Angami Public Organisation, Angami Youth Organisation aser Angami Students Union züngsemtemi random sampling drive inyaka liasü.

Hombarnü New Market aser Bayavü colony nung tapi agi sample bendena tendanga liasü.

Hombatashi nung sample 553 bendena tendangdang nisung 301 dak COVID-19 aliba puteta liasü. Sample temji Kohima nung taxi driver, dokan kiburtem, aayangertem aser colony saseng nung home delivery nisungtem dang nungi bendena liasü.

Directorate of H&FW ajanga khen amshitsü mozüki bushitsü tuyur

Dimapur, Monupii/May 18 (TYO): Directorate of Health & Family Welfare ajanga sangdong ka nung, district nung COVID-19 cases tali akumba anepalutsü atema District Hospital Dimapur ya Covid Hospital kumdaktsüba sülen tongtipang health services agütsütsü tatema temelen anepalutsü akumer. Anungji iba atema District Task Force Dimapur dang tekeratiba nung tsüinglanglen shia aliba

meratem agütsü metetdaksü: 1. Emergency secondary services densema tongtipang healthcare services agütsütsü atema sorkar meyong health facility- CHCs/ PHCs/ UPHCs/ SC/ SMIT1/ TB&CDH tetemsü jangjatetsüla. Emergency secondary services atema nüngdakba mapang NHAK nung aliba osettem khen atema belentsü akok.

2. Tongtipang services tem agütsütsü atema health facility ya karbo 24x7 facility ama jangjatetsüla. 3. Nüburtem nem jungjunga metetdaksütsü atema tongtipang service agütsütsü asoshi shimtetba health facility tem tenüng ayimsünga prokshitsüla. 4. Nüngdakba nübu nguteta amshitsü atema HR sentong tajung yanglutsüla: *(Maneni tapak 3 nung...)*

CMO Longleng-i Ward chairmen dang metetdaksü

Dimapur, Monupii/May 18 (TYO): Chief Medical Officer, Longleng ajanga Longleng nung aliba ward 11 indang chairman ajunga dang sangdong ka nung, district nung COVID-19 cases timba akumba ajanga tsüingsü apuba maparen tali akumer, anungji ki sema sample bendenba mapa meinyakteter, ta ashi.

Anungji Ward chairman tem

dang ward shia sample bendentsü atema tesem ka-ka bushitsü metetdaksü. Maneni item tesem bushitetba osang ya parnok nem May 19, 2021 tashinung metetdaksütsü shiogo. Iba dak sendakba nung osang tali tejangjaba metettsü atema mobile number 8974708121 nung tongteprateptsü akok, ta sangdong ajanga ashi.



**CHIEF MINISTER
NAGALAND : KOHIMA**

Dated: May 18, 2021

My Dear Fellow Citizens,

- As we are all aware, the country is in the midst of a second wave of the COVID-19 Corona Virus pandemic. The whole country has been adversely impacted and thousands of precious lives have been lost. I extend my deepest condolences and heartfelt prayers to the bereaved members of all those who have lost their loved ones. It is indeed a very painful period for every citizen of the country.
- Here in Nagaland too, the 2nd wave has reached us with positive cases on the increase, and several precious lives have succumbed to the disease. These are extraordinary times and we need to come together and work unitedly as one. Our State needs all of us, to pull all our forces together, and take every possible action in order to combat the challenges that lie ahead.
- I want to assure you that the State Government is making all-out efforts to protect and care for our citizens. Over the past decades, our health care infrastructure has not reached desired standards, and our facilities - like everywhere else - may not be the best. But, in the past year, we have made significant investments, resulting in improvements and upgradation in our overall healthcare facilities, and in strengthening health-related human resources. But, this is not the time to dwell on the past, we need to focus on the present and be prepared for the future.
- We extend our gratefulness to the Government of India and all other well-wishers for enabling us to improve and add new health facilities across the State. Within weeks, we will be establishing a new full-fledged 176 bed COVID Hospital in Dimapur and emergency care facilities for the medical fraternity. We are also ramping up the vaccination drive with procurement of more vaccines.
- While acknowledging the contributions of everyone, thus far, I appeal to all sections, from church organisations to tribal hohos and civil society groups to political parties and NGOs, to rise to the occasion, set aside our differences and let us collectively work as members of one team for the sake of our people.
- I want to extend the appreciation of every citizen of the State to all the frontline workers, especially those from the medical fraternity. They have been working day and night, making significant sacrifices and taking great risks, to keep us safe and healthy. During this time of crisis, we need to extend all our cooperation, assistance and appreciation to them, in order to ease their burden even by a small margin. The medical fraternity, both government and private, is doing commendable work, and I urge all of you not to be disheartened during this difficult period, but rather, continue to give your best in taking care of your fellow citizens. Rest assured that you have all our support and all of you are remembered in our prayers.
- We can also contribute our bit by ensuring that each one of us follow COVID appropriate behaviour in our everyday lives. We are presently in a situation of lockdown, which is creating tremendous inconveniences. However, we are all aware that this extraordinary scenario demands it, and we should be prepared that the lockdown may even need to be extended, if the situation requires it. I seek the cooperation of all of you, to ensure that the lockdown regulations are not compromised, for the sake of our own safety and health. We have to be extra cautious and extremely vigilant so that the disease does not spread to rural areas which can have far reaching consequences.
- We know that the weeks and months ahead may be very difficult, with greater challenges, but let me assure you that, we are all in this together. Every citizen is a member of Team Nagaland and we will win this fight as one Naga family. I am confident that with the positive cooperation of all sections, and the protection of God Almighty, Nagaland and the Naga people will emerge stronger, together we shall overcome this pandemic.

Stay Safe – Stay Home – May God be with all of us –

Kuknalim


(NEIPHIU RIO)



District Hospital, Phek nung May 18, 2021 nü nungi tenzüka arishi küm 18-44 tsüngta nüburtem nem COVID-19 mozü agütsüba noksa nung angur. (DPRO Phek)

Lokti balalai Asür C. Sashi Naga asükhu maneni lemsateper

Dimapur, Monupii/May 18 (TYO): Ajungbena May 17, 2021 nü Referral Hospital Dimapur nung Eastern Nagaland Peoples' Organisation (ENPO) tir C. Sashi Naga asüba atema Naga Hoho-i sangdong ka nung asükhu lemsatepa liasü.

Asür Sashi Naga ya bendanga agütsü nübur asoshi inyakba nübu ka liasü, shibai Naga nunger aser talisa ENPO jenjang balala nung tenzüka aruogo, ta sangdong ajanga ashi. Pa ya ajemaluba takum ka liasü. Pa akumli mapang nüburtem asoshi pai shilem tajungtiba agi. Naga nunger asoshi chichiba jabaso ka samaogo aser pa asüba ajanga tazüing adokba memelentetsü, ta Naga Hoho tir H.K. Zhimomi ajanga sangdong nung shia liasü.

Tang mangyim tejashi mapang Naga Hoho-i mangyimer kibong aser külem tenzüker den asükhu lemsateper. Asür tanüla teti tatem maka tesunep nung anisüngzükjang, ta sangdong ajanga ashi.

NFHRCC ajanga sangdong ka nung ENPO tir C. Sashi Naga asüba atema asükhu

lemsatepa liasü. Pa ya ochi nung nokdakba aser tasü-tait lenir ka liasü. Pa asüba ya Naga nunger aser talisa ENPO atema takoksa tulu alitsü. Mangyimer kibong nem Tsüngremi tashi tasen aser molung sunetsüba agüjang, ta NFHRCC sangdong ajanga ashi.

Angami Public Organization (APO) ajanga, May 17, 2021 nü ENPO tir C. Sashi Naga anojungi iba lima nungi bilaba atema aoksar aser kanga sasar, ta sangdong ka nung ashi. Asür C. Sashi Naga ya lenir tejangja ka liasü, shibai Easter Naga nüburtem ajungtektsü asoshi bendanga agütsü inyaka aru. Pa asüba ajanga anüdoklen aliba Naga nunger aser Naga nunger ajunga atema nükla aketba lenir ka samaogo, ta APO tir Razouvotuo Chatsu-i ashi.

Mangyimer kobong aser ENPO den APO ajanga mangyim tejashi lemsateper aser Tulusang Tsüngremi kinunger adianurtem nem tashi tasen agüjang ta sarasademtsür, ta sangdong ajangasa ashi.

NDPP tiri Elizabeth Merry asükhu lemsatep

Dimapur, Monupii/May 18 (TYO): Faith Hospital Dimapur nung May 18, 2021 nü NDPP tongti zülur T L Merry kinungtsü aser Dimapur Lotha Eloie taoba tir Elizabeth Merry anojungi asüba osang angashia ni atema temolung kanga korema jashiba mapang ka lir, ta NDPP tir Chingwang Konyak-i sangdong ka nung ashi.

Kü den ozü kibong aser NDPP nung alir ajungai asükhu lemsateper aser ner kibong

atema sarasademtsür, ta T L Merry dangi Chingwang Konyak ajanga shidi ka zülua liasü.

Kinungtsü aser tetsü ka takum ajungba samaba takoksa ya onsara tulu lir, saka nenok külemi mapangtem süyiba nü molung nung teti alitsü.

Taochi agi sünga alisang Tsüngremi nü molung nung tesunep agüjang aser asür tanüla teti tatem maka tesunep nung anisüngzükjang ta sarasademtsür, ta Konyak-isa ashi.

Dhansiri nung nisung tepsetba atema 2 apu



Diphu, May 18, 2021

(Agencies): May 15, 2021 nü Dhansiri nung nisung ka tepsetba dak sendakba nung Assam police-i nisung ana puogo.

Tenaji Manja nungi Francis Engti aser Diphu nungi Waisong Terang na ta jangjaogo.

Police-isa iba mapang amshiba pistol den injang

ngutetogo.

May 15 nü Diphu kübok Haticamp, Dhansiri road nung tenati asangur ka khaset.

Tasüsangji Debojit Sinha liasü aser pa ya Sitalabari nung telidak liasü.

Debojit ya tetsür medemer ka den motorbike ka nung mener Diphu nungi Dhansiri leni aodang lendongji atalok.

Nisung ana jagi len tom nung motorbike anendaktsü aser Debojit khaset ta pa den mena aliba tetsürlai ashi.

Iba mapang Debojit indang tekolak nung injang asem khaloktsü, ta police-i ashi.

Tenati kechi atema Debojit tepset'ar ano memetet aser maneni bushisingdang südar, ta parnokisa shisem.

Manipuri journalist & activist na NSA kübok tai tongloktsü

Imphal, May 18, 2021

(Agencies): Manipur sorkari journalist ka aser political activist ka National Security Act (NSA) kübok tai tongloktsüogo.

Tenati Facebook nung BJP lennirtem lutsüba atema May 13 nü apu.

Hombar aonung Imphal West District Magistrate Th. Kirankumar-i Wangkhem Wangthpi (41) aser Leichombam Erendro (40) na NSA kübok tai tongloktsü.

"Wangkhem aser Leichombam na tarutsü nung bail nung chiokba sülen maneni

state anema inyaktüsü akok. Anungji, tena nem yamaji meinyakdaksütsüla" ta District Magistrate-i metetdaksü.

NSA kübok tai tongloktsürtem ita 12 tashi tepuokdak ayutsü akok saka sorkari kuli tasen kar ngutetra ano mapang atsülangtsü akok.

Manipur state BJP vice-president Usham Deban aser party general secretary P. Premananda Meetei nati FIR ka benokba nung ajemdaker

May 13 nü journalist Wangkhem Wangthpi (41) aser political activist Leichombam Erendro

na apu.

May 13 nü Manipur state BJP President Saikhom Tikendra Singh Covid-19 agi asüba sülen Wangkhem aser Leichombam nati taitüsü aketba olentem lemsatop ta FIR nung shia liasü.

Tenati Tikendra Singh asüba atema Manipuri oshi nung "nashi scü aser nashi natzü ajanga mapa meinyaker" ta Facebook nung ziulu.


Manipur nung aer linük kübok tesem balala nungi rights activists aser telok aikati sorkari mapa talila inyaker ta aitsüogo.

Directorate of H&FW ajanga khen... (TAPAK 1 NUNGI...)

- a. Non-medical aser ministerial mapa inyaktüsü atema danga department nungi staff tem meshitsü atema.
- b. Medical mapa atema CMO, MS amala nungi HCWs tem agizütsü atema.
- 5. Temolung melemeteti alirtem tekeratiba nung jangjateta balaka anepalutsü atema iba amala health facility ajak nung Flu Corner aser Isolation facility amenotsüla. ILI & SARI cases ajak aser mozüki nung munga aliba

- shiranger ajunga testing policy nung aliba ama tendangtsü.
- 6. Chiyongtsü aser aben süoshi shidokba yimya tang aliba police nung ama alitsü.
- 7. Bushiteta aliba health facility nung nüngdakba mapang amshitsü atema diagnostic aser blood bank services ya NHAK tiyong südaktsütsü.
- 8. Health facility balalai shirangertem mapang shidak nung bener aotsü atema ambulance service

- network amenoktsüla. Nüburtemi kanga junga metetsü atema call centre ka amenoktsüla mesüra ambulance amshirtem indang contact tejangja osang prokshitsüla.
- 9. Staff aser laboratory sample tem belenshitsü asoshi danga department nungi nüngdakba garitem meshitsüla.
- 10. Covid Hospital Kohima nung nüngdakba security agütsütsüla.



May 17, 2021 nü Arunachal Pradesh kübok Khonsa jila nung sepaitemi police den yaritepa NSCN (IM) züngsem ka apuba noksa nung angur. Osang tejangja ka angazükba nung ajemdaker parnoki mita aodang NSCN (IM) züngsem apu aser pa Tirap District kübok Khonsa Police Station ket nung agütsüogo.

NSCN-KYA telungpurtemi Longkhaw nung nisung ka aputsü merang

Itanagar, May 18, 2021

(Agencies): Arunachal Pradesh kübok Longding district nung NSCN-K indang Yung Aung telok nung züngsemtemi nisung ka pur aotsü merandang injang khatok.

Iba ya Longkhaw yim nung atalok saka yimdaklirtemi telungpurtem nem nisung pur moudaktsü.

Telungpurtem jagi Khamjan Wangsu ta ser nisung ka pur aotsü atema yimdaki aru saka yimdaklirtemi pa pur meyoxtsü atema merandang telungpur pezü dak teka sangshi.

Longkhaw nung Gaon Bura-i telungpurtem ket nungi AK-47 assault rifles ana puogo.

Yimdaklirtemisa Longding Police Station nung telungpurtem anema mapa

inyakang ta shia FIR ka benokogo.

NSCN-K-Yung Aung nung Lieutenant Palai Wangnow-i anir telok kati Khamjan Wangsu aputsü atema yimdaki aruba sülen injang khatok ta FIR nung shia lir.

Longkhaw yim indang lenmang nung telungpurtemi Khamjan Wangsu reshikangshi, ta parnoki ashi.

"Onoki Khamjan Wangsu chiokdaksütsü atema timi jembi saka tekong merangba ajanga telungpurtem den rarateptsüsa aküm. Idangji onoki Khamjan Wangsu kümzük" ta FIR nungsa shia lir.

"Onok tiptema alitsü atema nenoki nüngdakba mapa inyaktüsü mepishir" ta yimdaklirtemisa FIR nung metetdaksü.

Tingrai nung grenade apokba nung ULFA shilem lir: Assam police



Margherita, May 18, 2021

(Agencies): Digboi kübok Tingrai market nung grenade ka pokdaksüba nung tai tonglokja alir nisung ana Assam police-i puogo aser iba nung ULFA-i shilem agiogo ta police-i kuli agütsü.

Iba mapang amshiba Pulsar motor cycle ka police-i ngutetogo.

Mongulbarnü police-i Lakhpathar nung alir Hiren Gogoi (Robin/Monu) den motorbike

apu. Iba sülen anüngdang Ranjit Changmai apu.

Assam adena orr aliba ULFA lennir tejentemi tetuyuba agütsüba nung ajemdaker grenade pokdaksü, ta Assam police-i ashi.

Taoba hopta ULFA-I sangdong ka nung parnoki iba nung shilem kecha magi ta shia liasü.

Police-i apuba nisung anaprong ya ULFA den tesentaktep lir.

COVID-19 Arunachal: Nisung 304 dak putet; 4 asü

Itanagar, May 18, 2021

(Agencies): Mongulbarnü Arunachal Pradesh nung nisung timtiba dak COVID-19 putetogo.

Tanü nisung 304 dak putetba züngsema nisung ajak agi 22,106 kümogo aser külen COVID-19 puteta alir nisung 4 asüba züngsema tasür ajak agi 85 kümogo.

"Tang Arunachal Pradesh nung nisung 2,346 anepaludar," ta State Surveillance Officer Dr Lobsang Jampa-i metetdaksü.

Nisung 304 putetba nung rapid antigen tests ajanga 267, RT-PCR ajanga 22 aser TrueNat ajanga 15 putet, ta Jampa-isa ashi.

COVID-19 puteta alir asürtemji East Siang, Lower Dibang Valley, Upper Subansiri aser Lohit district nung nisung

kaka liasü.

Yashi nungi COVID-19 puteta alir nisung 214 tashi taneptsü nguogo aser parnok züngsema nisung ajak agi 19,675 kümogo.

Arunachal Pradesh nung sample 5,06,975 tashi tendangogo, ta Dr Lobsang Jampa-isa ashi.

Tang tashi nung Arunachal nung nisung 3,10,761 tashi vaccine agiogo. Parnok rongnung arishi küm 18-44 tsüngda alir 3,674 dena lir, ta State Immunisation Officer Dr Dimong Padung-i metetdaksü.

Hombarnü ketdangsurtemki Capital Complex Region nung anogo 14 curfew alitsü tetuyuba agütsüogo.

Nisung aikati COVID-19 inyakyim sülen manidakba agi ketdangsurtemi curfew oziung benok.



TIR YIMYIM YIMOBILEM (EDITORIAL)

DIMAPUR RASEMNÜ, MONUPII (MAY) 19, 2021

Inyaker agi meperitsü !

Tang ama tashidak wara tamajung ayimsünga aodang, aji nokdangtsü atema tang amai nübortem kechalenia moudaktsüi pei kidang mokdanga ayuba nükjijong ya tashidak menatepa moudaktsüi nokdangtsüba tebilemsü kisung masü saka government maparen nung terenemtsü aika lir, ibayongji nisungtem pei pei kidang mongdakja atadang, shiranger ayutsü kiojen renemshiba den osettsüset aser nübo bushisema ayutsü ta renemtsü asoshi mapang apulokba sentong ka lir. Tangar state-tem den medemdangra, Nagaland nungbo Covid-19 agi kanga koda masü shiranger aikabo mali aser ano aikabo masü, saka tang yongi government nung ketdangsertemi mozü kidang yipten aser oxygen agi meperitsüba indang jembir, iba jagi balaka nübortem shisaboludaktsür aser joko karibo peisasa oxygen dena alia ayuba otsü lir. Atangji, pei taküm kümzüksü asoshi kümndanga aliba den takokeribo yamaji nüngdak alioka ayutsüla, ajisüaka junga mebilemdangi asenbo tangbo menügdaker ser nung asen taküm kümzüksü asoshi kisung bilema senotsü akaba apia, tang ama tensa tia nung chiyongtsü aser mozü mesüra oxygen amaji talila alioka ayuba agi nüngdakba purtem meperir, dokan nung jenjang atur aser mozü kidanga nüngdaktem maka kümadoker. Ibaji angateta asen kisung achitsü alioka ayutsü melenbo asen peria yur talilajibo nüngdakba purtem nem agütsütsüla aser asen shirangtsü tsübuwa mozü aser oxygen talila alioka kidang meyui mozü kidang agütsütsüla. Aji oda, tang mozü kidang shiranger masem arura yipten aser anepalurtem agi meperitsü tsübuwa mapang tatsüka nübortem mesenzüdaktsüi nokdanga ayuba mapang ya, asenokia akok tashi mozü kidang inyakerkem tasü itdakja yariteptsübaji kanga tongtibang asütsü. Atangji, asenok nübortem dak angatetter amato saka mangatet tuluka lir, ibaji asenoki asenokbo kodanga meshirangtsü aser kodanga mozü ki bushia maotsü amai bilemer, ibayongji tang ama temenatempa tashidak wara tamajung aruba mapangbo asenok anasa mesüra asen kidang mozü kidang inyakerkembo melidaktsüner. Aji oda, tashidak mena tsübuwa agi yaküm küm corona tashidak aru tenzükdangbo medical nung inyaker karbo bara kidang lia aliba odaktsüba tashi ataloka lir. Shitakba agibo tang ama mapang ya-ang medical nung inyakerkemji asenok atema tenügdakba asütsü ser nung, asenoki asenokbo parnokji kodanga menügdaktsü amai bilemer. Iba ama nisunger shisatsüji kangasa temesü aser peisasa pei akoksatsü inyakba mapa ka lir. Iba nüngdakji angateta asenoki parnok sempatsü melen meimtsüla aser parnok nüngdaktem reprangteta agütsütsüla. Ashiko, asen government-bo sensaker dang masü saka tera akaba agi indandindanga lemsaa meinyaktetter asünungji, lendong pateka nung ya mozü kidang oxygen-jibo yutsür inyakerkem asoshi tenitebang nembangtsü mask dena makatsüa akok. Itemji mozü kidang ketdangsertemi maka ser maka ta meshitettsü, iba kuliji parnokiang meteta lir. Ajisüaka, mozü kidang oxygen makaba agi masü saka doctor aser nurse-tem asoshi PPE ajungaji khen yutsür, mask kisung makaba agi asenok süadoktsü, kechiyong mask magi ser teyarir shinga asen anasai marutsü. Ibaji dang masü saka lendong tulutibaji, kodang inyakerkem nem chiyongtsü nungi shir süoshi tashi shitak magütsüür, parnok shirangadoktsü , anungji kodang mozü kidang inyaker doctor aser nurse ishika rongnung kar shirangadokdir, osettsüset aser yipten makaba aser meperiba tebilemsüji yutsür, inyaker agi meperiba agi mozü ki shibangadoktsüsa akümtsü. Asen lima nungbo iba amaji ataloktsü ana nung lir. Iba amaji matalokdaktsütsüsa, joko government dak meimlai asenoki asenoksasa yaritep tenzüksüla aser joko asenokia mozü kidang inyakerkem tasü aittsüsa aser pelatsüsa langkabosa inyaksüla . Tangarbo ibai pei akaba agi nüngdakba purtem yariba mapang lir saka asenokbo asen kisung atema bendenba mapang to manener. Tangarbo tasüa majem pei arogo, pei telok aser pei kija kibong rongsen agi mozü ki tashi lapoka yur yaritepba mapang lir, saka tasütsüa asenokisa tetsübuwa tsübur amai PPE agir, mask dena double agir mozü ki anasaia moutetter aser asü ama nung yariteptsüa tsübur. Iba amaisa tsübutepa alinungbo, Covid agi masü tetsübuwa agi asenok ajak sümatsü. Atangji, tsünglu arudang anüshi apong ama, Covid wara agi matongtsü atema tekümdangtsü aser teinyaktsü ishika lir, itemji asenok ajaki shitak kanga kümndanga inyaksüla. Ibai nisung shiai nisung kakabosa kümzüksü aser yaritsü bilema inyaksüba mapang lir. Nai nisung ka memetetika kümzükra, ano tangar nisung kati nai memetetika na kümzüksü.

OLEMSABANG

Taochi ya kechi dang ajar, naina meteta lir ma?

~ R. Imkong Lkr, Mangimen Area, Lahorjan,
Karbi Anglong, Assam

Taochi ojang ya temeim den apoktepa amshiba ojang ka lir, yangi taochi tetezü ya yamai ratettsü akok, tatishitsü agi nisung kati aibelen mapa tulu ka inyak anungji pa nemji tai tatok agütsütsübaji leman sadema mali; sakasasa, alima temzüng agi aibelener nem tang tatok agütsür ta shia alinungji, aibelensang tangji temeim tulu sayua tatok agütsüba dangji taochi sayuba ta ajar. Yamaji tebo Tsüngremi pa taochi agi, meimcher dang temeim tulu sayua pai pa ajaso chir alimasanger menen alangzüksü asoshi alimai yok ta shi angur- Yohan 3:16.

Yangi tatishitsü atema alima otsü ka bener arur, kenü anogo yimtsüng ka nung asangur chanu kati par kidang medemertem ishika ayongtenger chia jema asayatapa kazüa liasü. Iba mapang nungi parnok tsüngda nung mapa tila tari ka mechi nung mangatetep tulu ka adok, aser kati ka dak teka sangshitepa raratepdang kabo teni nungi azü alua atsüng, aser karbo zübu tulu-lu keta yirutsü. Aser ano raratep dangji medemer anabo deben (arm) sükdanga yirutsü; yamaji parnok raratep tiyalong nungji medemer kati kanga ain adoka kerosine totzü bottle sünga aliba ka bener aruagi parnok raratepa aliba ki nungji ajaklen rükshia doktsür mi senoktsü. Idangjibo mi jagi kiji khen agi metsü küma rongtok, aser ano kidanger anasa aliba ki pezü tashi temshia rongtok. Panüji tia kaa tsütemmonger kar iba tesemjagi aru, aser parnok denji yariteper kiyonger kidangmonger temi arüsangokja nübo aika ayongteper miji anarongtena ka remseptet. Aser nikong mapang adongdang alu nungi tsürabourtem adokba mapang nungji yimtsüng anasa adokdang yimti nung tu kanga lulutepa angashi, aser parnoki yim tu atongdangbo karbo ki ajak temshia rongtokmar liasü, aser item kibong temjibo aben sü-o-shia maka den chiyongtsüa maka ta alitang, temeimer kiyongertemi parnok kidang aniketa chia jemdakja mejangdakja liasü.

Aser tasüngji, tetezü tananüji yimer tambourtem ajak salang nung atenshi, aser yimer lanu tain ajak sendena yur yashi anogo tu mi lendongji koma kodaser ataloktsüsa aküm, aser shirnok ajanga lendongji ataloktsüsa aküm? Ta asüngdangtepa bushiteper kelen, tanur asangurtem tu tesem ka nung mendaktsü. Iba mapangji asangurtem rongnung anabo deben (arm) sükdanger aliba tu kari anepalua anasa aliba hospital kati annir aotsüsa aküm. Aser anünga aliba asangutem dang tu tambourtemi senchi tulu achitsü ta merena liasü, aser yangji tanurtem raratepa lendong tulu adokdaksür rongnung tu kabo par yimdakji samen tazüng nungbar chir-a ka densema mena liasü ta otsü jagi ashir.

Iba mapang nungji parnok tia akatsü kaji par yimdak kanga tang nungtuku pastor ka liasü, aser pajia telok sentepa aliba tesem jagi arua mena liasü, anungji pai yashi lendong tuluji kodaser atalok aser shirnok ajanga adok ta asüngdangtepa liasü. Idangji pastorba jagi nokdaker ashi, aküm tsüpua aliba yimsüsürtem, khen ajem ajema angaa alitsü mepishir, ni anogo asem jakdang pungmang mangdang ka anguba telok dang shiner, kü pungmang mangdangji yamai liasü, asen yimdaki yipru mopung tetsübuttsü ka anüdoklen nungi ona liasü, aser yimti nung aliba ki jen aika kanga mejungi chirepa angu, aser nisungtem tsüngda nung lulu lupong mangatetep tuluka atalokba angu. Anungji tambourtem nenoki jungjunga angaa lidaktsüner, yamaji asen yimtsüng nung alirtem temenen agi jaa atuba yong Tsüngrem nungi asenok dangi temerenshi ka yoka lir. saka tia maka asen tanurtem kar dak iba timtemji atalokogo. Anungji nenoki tanurtem dangji senchi tulu achitsüji mebilemi odang senshiatokba tajungba asütsü ta nibo kü tibelimba ka shidanger. Aji ta mesüra asen yimtsüng nung ano tama ataloktsü kar ataloka lir ta bilemetsür. Aser ano nenok tambourtemi tanurtem dangji senchi tulu achitsüsa aküm nunga iba senchiji tanurtem jagi agütsütsü masü, saka asen yimdak yimsüsür tazüng nungbar chir-a ana tashi densema lirji, item tsürabourtem jagiangsa senchijibo agütsütsüsa akümtsü, anungji asenokbo tanü senden ya odang senshiatokba tajungba asütsü ta nibo shidanger. Iba mapangn ungi yimsüsürtem meren merena mentepa aliba purtem tu parnok o parnok na tsüngda nung bangkatepa reprangtepa alitang, tanubour rongnung kati yakta nokdaker yamai ayimoktsü, asen yimertem tanü tashi asen yimtsüng nung iba ama tama ataloktsü atalokdanga maru, anungji pastorbai ashiba medemji asenokbo odang senshiang tajungba asütsü ta nia kü tebilemba ka shidanger ta pa o atemtangbo joko telok sentepa aliba tu aika nokdaker pakhsia oa anguji, tanüngba purtem tua ajak pakhsia oatok. Iba tatalokba ya Tsüngrem temeim aser pa taochi dena liasü ta tesülenang nüburtem aikati angateta rajema aru ta otsü jagi ashir.

Tanapuba nung ano iba taochi ya angatettsü mechi nung tatishitsü ka bener arur, taoba mapang nung school ka nung student-tem aika zünga liasü, item student-tem jagi küm piyong pei pei akokba yari pei tesayurtemi sayuba lessontem tu kanga meranga angazüka züngyongasa aru. Saka küm tatembang tatitang mapang atongdang studenttem rongnung kabo tia maka kanga shiranga ata, anungji pa temang nung tashi maitba den ano mangmang kuri agi donger temang tu kanga mejungi liaka, iba kümji fail mesünüba yong pai tatitangji tatem tashi meranga agüja aru. "Ni bilembo, parnok tesayurtemi tanurtemji kechi tia nungsa tatitang tu agütsüdar ta reprangshimer kelen, studenttem rongnung karbo teni tebang nungi nebtzübantzü yima asentzü agi yimbanger aliba purtem tu Headmaster-ba den tongtepa metetpelar kelen student-ba jagi subject kwi agüja ali, itemji jungjunga reprangshimer anünga akaba subjecttem nungji simple pass sütsü nunga ajak atema tajungba tang asütsü ta tebilemba ka nibo shidanger. Saka tesayurtem rongnung karibo studenttem tatitang agütsüba mapang nung parnok timtem khen agi mereprangtetba tesayurtem kar lir, item amala tesayurtemjibo tesayur mapa inyaktsü khen agi malang mesüra metemsü ta nibo shiteter."

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir



May 18, 2021 nü Israel Gaza arrtsülen Israel nunger sepaitemi Hamas kiralongrartem den raratsü renema aliba noksa nung angur.

Pakistan nunger Khristantem dang Israel pu-masemtsü mepishi

Lahore (Pakistan), May 18 (Agencies): Tang Gaza Strip nung Palestine nunger kiralongrartem aser Israel sepaitem na tsüngda rara adoker aliba mapang nung meimchir temeden atema inyaker kati Pakistan nunger Khristantem dang yimjak nung odiodia Israel pu-masemtsüla, ta mepishia metetdaksüogo.

Pakistan nung Khristantemi odiodia Israel nunger pusemra linük nung Muslim nungeri Khristantem anema inyaksü, ta arendaka Mary James Gill-i Khristantem dang yimjak nung Israel pu-masemtsü mepishir.

Tawa Center for Law & Justice Director aser meimchir temeden atema inyaker nungtugu, Mary James Gill-i sangdong ka ajanga, "Tamangba yimsü ajanga kechi tesayuba agütsüdir agüjaka nenok ya Islamic Republic of Pakistan sensotem ta bilemtetsüla, aser linük tama südaktsütsüla. Iba linüki

(Pakistan) Israel ya linük ka ama mezüingshir. Anungji Israel pusemra ajanga nenoki (Khristan) timtem ajurutsüa akok," ta metetdaksü.

"Anungji tang ama mapang ka nung Khristan temeim sayua Pakistan nunger Muslim den tejashi lemsateptsüla. Ibaji inyaksü tasak süra ola madoki alitsüla. Yimlibilema Israel pusema yimyim mayimtsüla," ta Mary-i metetdaksü.

East Jerusalem nung Palestine nunger kibongtem mindoktsü atema Israel-i maparen tenzükba sülen tang rara tulu adoker lia Pakistan nung pastor aser Khristan lenir aikati Israel atema sarasademtsü ayongzükogo.

Church of Pakistan nung pastor, Saleem Khokhar-ia Facebook post ka ajanga, "Tsüngrem ya Israel nunger jenokdak. Tsüngremi par tsükchirtem atema raratsür, anungji shingaija parnok (Israel) meyrutsütsü," ta metetdaksü.

Social media nung Pakistani Christians Voice for Israel-ia Jerusalem nung yimjung alitsü atema Khristantem dang sarasademang, ta mepishi.

Tan ita tetenzüklen missionary Pastor Irfan James-ibo pa indang facebook cover photo Israel nunger wako amshia liasü.

Pakistan Ato kilonser, Imran Khan-i sangdong ka ajanga, Pakistan linüki Palestine nunger pusemer, ta metetdaksüba den külemi tawa Israel sepaitemi Gaza Strip amakba aitsü.

Tesüiba küm aika Pakistan nung Khristantemi sorkar dang Israel-i temeshi aini oa temeshi tesemtem semdangtsü atema Khristantem nem temelaba agüjang, ta takhangba agüja arur.

Pakistan aser Israel na tsüngda tesendaktep mali aser Pakistan ketdangsertemi Khristantem Israel-i aotsü memelar.

UP kübok Ghaziabad nung Khristantem tasü mang aremstsü memelar

New Delhi, Monupii/May 18 (Agencies): Tang India tesem balala nung coronavirus tashidak agi anogo shia nisung jenti asüba mapang Uttar Pradesh kübok Ghaziabad district nung ali dak sendakba mangatettep ka adokba sülen leper nung Khristantem tasü mang aremstsü memelar, ta osang ka ajanga metetdaksü.

May 17, 2021 nü osangbenertem den jembidang Eternal Life Fellowship Society nung pastor, Maneswar Das-i, "Tanü-a ozü Arogo nung züngsem ana coronavirus tashidak agi süogo, aser asüpila sentong agitsü atema onoki administration office nung temepishiba agütsüdar. Leper nungji tasü mang aremstsü atema memelara onoki kidanger state-Delhi nung ang tasü mang aremstsüa akümtsü," ta metetdaksü.

"1988 küm nungi onoki iba

leper nung tasü mang aremer, aser tamalenbo tetsükdaksü kecha majangshi, ajisüaka 2014 küm nisung anati leper liji parnok meyong ta ashi. Onoki iba osangji angashiba sülen local municipal corporation nem metetdaksü, saka ketdangsertemi iba ken oji court nung ang benokang ta onok dang tuyu. 2018 küm municipal corporation-i leper yanglutsü atema iba liji Khristantem nem agüjang ta benoka liasü," ta pastor-isa metetdaksü.

"2018 küm August ita nungi tenzüka onoki iba leper nungji tasü mang aremer, saka taoba ita Ghaziabad municipal corporation-i, iba liji nisung pezü meyong - ni densema nisung ana den Ghaziabad municipal corporation meyong ta metetdaksü. Iba ken o ya court nung benokba sülen court-i osang tasen ka memetetdaksü tashi leper nungji nisung meremi

atatsü tuyuogo," ta pastor Das-isa metetdaksü.

Pastor Das ya Ghaziabad Christian Leaders' Fellowship nunga general secretary inyaker. "Iba ken o ya tang court nung benoka lir, ibayongji district nung coronavirus agi anogo shia nisung jenti asüba mapang nung onoki züngsemtem tasü mang aremstsü atema tetsükdaksü ajurur," ta pai ashi.

Ano local pastor ka, Ankur Massey-ia, "Leper maliba agi tasü mangtemji Delhi-i bener oa aremstsüa akümer ta Khristantemi shiogo," ta metetdaksü.

May 17, 2021 tashi nung Uttar Pradesh nung coronavirus agi teshirangdakpur 149,032 lir aser iba tashidak agi nisung 17,817 süogo. Ghaziabad nung coronavirus agi teshirangdakpur 4,320 lir aser April 1 nungi May 17 tashi nung Ghaziabad nung coronavirus agi nisung 375 süogo.

ANO GO ABEN TSÜNGREM DEN

Asükümba samatsüba

"Ajangla asükümba jenjang kong ali? Ibaji jentokogo. Kobala ozü ng ajanga? Mapa inyakba ajanga asü? Masü, saka tamang ajanga". Rom 3:27

Nisunger taküm libaliro yimya nung kar asoshibo ni ta asüba shisatsü agi sünger lir tatishitsü agi: ni jembitet, ni inyaktet, ni otet, ni koktet ta asüba amala. Iba ama shisatsü adener nisungji reprangra pa/la dak mezümeküm shisatsü alinung tangar indang züngoka jembiba mesüra inyakba aiben mangutsü, lia liabo pa/la taküm yimya aser mapatem jagi lakteter külen aikati pa senzüka toktsütsü.

Mezümeküm aser asüküm yimya ya ozü ng balala yanglua azüoktsü makok mesüra mapa tapu balala apiteta inyakba ajangaka azüoktettsü tamakoktsü. Iba ya mojing asüküm aser mezümeküm agi sünga lir; abenjagi pa kotak temeshi menden nungi alimai arizüka yok. Asüküm aser mezümeküma aliba takümji tanga kecha agia masü, saka tamang ajanga dang samatsütsü akok. Ne dak asüküm aser mezümeküm shisatsü lir asü? Ibaji koktettsüsa Tsüngremer nütsü ng ka ama raraba sübotsü sobur nokdakang.

Sarasadem

Kü dak asüküm aser mezümeküm shisatsü samadakjang ta Kibuba Yisu tenü ng nung sarasademer. Amen

Pakistan nung Muslim nunger telok kati Khristan kibong 80 amokmeren

Lahore, Monupii/May 18 (Agencies): Paksitan linük nung aliba yimtsü ng ka nung Muslim nunger 200 dak temai Khristan kibong 80 mita oa amokmerenogo, ta International Christian Concern (ICC) osang ajanga metetdaksü.

Khristan lanur telok kati Tenla ki merüktetba mapang nung lanurtem aser Muslim nunger ali kibur ka na tsüngda mangatettep adokba sülen May 15 nü Muslim nunger 200-i Pakistan Punjab Province nung Okara district kübok Chak 5 yim dak Khristantem amak, aser iba mapang nungji Khristan 8 yirutsüba den külemi Khristan kibong 15 meyong ki raksatsü.

Osangbener den jembidang Mangta Masih-i, "Parnok (Muslims) ket nung bottle, long, po, süng aser longru liasü. Tangartemi apu amshia kilemi atuba sülen ki raksatsü. Parnoki amakba mapang nung onoki tetsür dakbo mazüktsü mepishia liasü," ta metetdaksü.

"Parnoki kichiba raksar ki telungi atuba sülen onok kou nung amer kimai atsüzük. Parnoki tetsür tanurtem dak-a azük aser süoshi shisatsü," ta Masih-i metetdaksü.

Osang angazükba agi, Khristan lanur telok ka aser

Muslim nunger ali kibur ka tsüngda mangatettep tilaka adokba nungi tensa tamajungba aküm.

Chak 5 yim dak St. Thomas Arogo nung pastor, Khalid Mukhtar-i ashiba agi, Khristan lanurtem aika Tenla ki merüktetba mapang nung Muslim nunger ali kibur ka Tenla kidangi aruba sülen pai lanurtem dang, nenoki kü dak auyi paloktsü, ta tai tongloktsüba nungi mangatettep adok.

Osangbener den jembidang pastor-i, "Ketdangsertem tashi maitba ajanga nütsü ng ajema aliba tamangba yimsütem anema inyaksü tasü itdaksür. Aiben aibelenertem nem temerenshi magütsü chioker. Nija mangatettep mangyangtsü atema tamangba yimsü amshir. Khristantemi ano parnok amaktsüa akok ta tsübuteper," ta metetdaksü.

May 16 nü Khristantem St. Thomas Catholic Arogo Tenla kidang adenshir Muslim nunger anema kuli balala bendenba sülen police nem ken o agütsüogo.

Kasa anogo nungjisa deputy superintendent of police-i iba yim semdangba sülen pai Khristantem dang iba tatalokba bushisü ng dangtsü, ta nangzükogo.

OLONG PAITEP # 5816

1				2					3	
						4		5		
6			7							
					8		9			10
11										
12		13					14			
		15								
						16				
	17									
					18					

TIPILEN

- 1. Yakob tetsü - (6)
- 4. Mezüng nisung - (4)
- 6. Tasen lai kaket ka - (5)
- 9. Au lanu - (2)
- 12. Tejen lai 21 buba - (11)
- 15. Tekolak tembar - (2)
- 16. Zütsüra anepsang - (5)
- 17. Kain tenu - (4)
- 18. Hana-er jabaso - (6)

LANGTSÜNGLEN

- 2. _ _ _ gki - (3)
- 3. Telungpur telok ka - (2)
- 5. Tsüngremi mezüng poktetdaksüba - (5)
- 7. Tia - (4)
- 8. Yakob-er jabaso ka - (5)
- 10. Abraham tebutü - (4)
- 11. Rebeka kinungpu - (4)
- 13. Esau tenu - (5)
- 14. Tzünglu tilala aru - (4)
- 16. Jafet tebu - (3)
- 17. Teka agi kongshi - (2)

OLONG PAITEP # 5815 TELANGZÜBA

TIPILEN :

- 2. Pongsen, 5. Lepko, 7. Omen, 8. Maongka, 10. Yangkhu, 12. Senpong, 14. Angu, 15. Raksa, 16. Arameso,

LANGTSÜNGLEN :

- 1. Alimang, 2. Pongen, 3. Samaru, 4. Nün, 6. Pio, 9. Nüngdak, 10. Yongya, 11. Kongro, 13. Ora, 14. Ata.



AO OSHI ANGAZÜKDAK:

TANÜ ANGAZÜKTSÜBA OJANG

Jaja

(v) tetsüng agi senzüba (walk)

* Anogo piyong onok tetsüng agi **jaja**

Jakden

(adv) tejak agi sayuba yimya aser tereprangtsü (facial appearance)

* Naga nungertem ya China nunger **jakden** mesüker.



Tir Yimyim

TANÜBO NAI LANGZÜANG

Q. Koba tentet ajanga Smokeless Cremation System (2021) yanglu?

- A. Indian Institute of Technology, Ropar
- B. Indian Institute of Technology, Madras
- C. Indian Institute of Technology, Kharagpur
- D. None

_____ (Taruba adok nung onoki langzüsü)

YASHI ADOK TELANGZÜBA : Ten Degree Channel

NAI-A YA METETTER MA?

Alima ajungalen 'Ocean basin' shia nung yipru (Cyclone) adokba atema nungja ka ka jatettsür. Item yipru tesashi atema nungja balala ya Regional Specialised Meteorological Centres (RSMCs) aser Tropical Cyclone Warning Centres (TCWCs) ajanga agütsür. Yipru adoktsü lia nübur dang tekümdangtsü osang agütsü aser mela mela iba yipru tenüng bilemettsü asoshi, techincal' nungja aser number' melen yipru balala atema tenüng ka ka agütsür. Yipru (Cyclone) nungja ya tapi agi dangbo magütsür, saka yipru yimya asadanga aser tetezü ka keta tenüng ya jatettsür. Cyclone Tauktae, koba India anüolen (West) aser anüolen tip tsütsü (South) süia/kongshia liasü, iba yipru nungja ya Myanmar nung meteorologist temi agütsü. Burma oshi nung ajaba 'Tauktae' (Tau'te) ya kako (Gecko) tapu ka aser iba kako ola kanga dang tatsüng lir. Taoba küm (2020) November ita tatemlen India nung anüolen tip tsütsü adokba Cyclone Nivar nungja ya Iran ajanga agütsü.

SUDOKU # 5859

	2		8	7	3	5		
3	5	6			9		7	4
			5	6	4		3	
	4					1		
7			9	5		2		
2	3				6	9		5
	1	2				3	5	
9		3			5		4	
8	4				2	7	9	1

TELANGZÜBA # 5858

	1	5	2	9	6	4	3	8	7
4	9	6	8	7	3	5	1	2	
	3	7	8	1	5	2	4	6	9
	6	1	3	7	9	5	2	4	8
5	4	7	2	8	6	9	3	1	
8	2	9	3	4	1	7	5	6	
	2	6	5	4	1	7	8	9	3
7	8	4	6	3	9	1	2	5	
9	3	1	5	2	8	6	7	4	

OJANG LUTEP # 5402

- POTER :
- TUNGAJBO :
- KIAJA :
- REGNEPRANR :
- SEAR :
- MPESET :
- GAJUN :
- AMTERSHITEBO :
- AKAJI :
- PUSAR :

OJANG LUTEP TELANGZÜBA # 5401

TANGAR LIBALIRO JUNGA MEMETETI SHISA MULUNG AJEMRA RONGRONG ADOKA TSÜKCHITEPER

TAN HOPTA ATEMA - KOMA SÜLA ?

Q. Covid mozü kidang inyaker doctor, nurse aser staff-tem asoshi anogo shia chiyongtsü mozü ki anasa aliba arogotemi longjemer agütsü nunga koma süla ?

Gujarat CM-i Emergency Ops Centre nungi Tauktae yipru asadang



Mumbai nung Tauktae yipru süiba sülen gari tem süngtong agi raksatsür aliba noksa nung angur.

Gandhinagar, Monupii/May 18 (Agencies): Gujarat Chief Minister Vijay Rupani-i, taoba ghonda 24 tsüngda State Emergency Operations Centre (SEOC) nung mapang timba ka intoka Tauktae yipru tensa asadango, ta official sangdong ka ajanga Mongolbarnü metetdaksü.

Hombar anepdang 9 ako shi nung yipru agi Gujarat tzüküm kongshiba mapang Rupani SEOC (Gandhinagar nung central control room) tonga aru aser pai tensa asadanga den ketdangsurtem dang lensayua liasü, ta kasa sangdong ajanga metetdaksü.

Pa Hombar nü ayaterem tashi control room nung kazü aser yipru agi kongshir aliba district tem nung collector aser

field officer tem den phone ajanga sensak asema den virtual senden ayongzüka mena liasü. Maneni Rupani Mongolbar anepdang SEOC-i meyipa aru aser idakji ghonda asem shi mapang intok. SEOC nung pai ketdangsurtem den lepa repringshiba senden ka ayongzüka amen, kong yipru ajanga teraksatsüba bener arutsüba aser tensa indang osang balala bendener aliba asadanga liasü, ta sangdong ajangsa metetdaksü.

Tensa asadanga sülen Rupani-i osangbenertem dang, yipru tesashi agi Gujarat kongshiaka state sorkari nisung taküm samaba aser teraksatsüba tulu adokbabo nokdangtetogo, kechiyong nisung lakh 2 dak tema

tekümzüba tesem bushia aniner liasü, ta ashi.

Gujarat nung yipru lendong nung nisung tenet süogo aser tzüküm nung süngtong, electric pole, ki aser lenmangtem raksatsüogo, ta ketdangsurtemi Mongolbarnü ashi.

Tauktae yipru yagi Gujarat tzüküm nung Saurashtra kübok Diu aser Una tsüngda kongshi aser ayaterem tashi nung anen, ta India Meteorological Department (IMD)-i ashi. Yipru ya Gujarat tzüküm kanga sashia sui aser tashi meiti aküm.

Mongolbar anepdang yipru yagi Saurashtra kübok Amreli tesem dak kongshiogo, ajisüaka nikonksütsü tashi nungbo tashi meiti akümstü, ta IMD-i ashi.

Vaccine aika supply asütsü merangdar: PM Modi

New Delhi, Monupii/May 18 (Agencies): Ato Kilonser Narendra Modi-i Mongolbarnü state aser district balala nungi field ketdangsurtem den Covid-19 tensa indang sensaksemogo. PM Modi-i sentong nung shilem agirtem dang, Union health ministry-i Covid-19 vaccine telongjunga agütsütsü atema maneni inyakdar ta ashi.

"Covid vaccines telongjunga aika supply asütsü atema maneni inyakdar. Health ministry-i vaccine agütsüba inyakym kanga junga achaayangdar," ta PM Modi-i ashi.

PM-isa, district nung nisung kwi nem vaccine agütsütsü nungdaker, iba indang tali tajungba angatetdaksütsü aser vaccine agütsütsü atema renemshiba nung ketdangsurtem nem teyari agütsütsü asoshi vaccination schedule anogo 15 jelia metetdaksütsü atema merangdangdar, ta ashi.

"Iba ajanga district nung nisung kwi nem vaccine agütsütsü aser vaccine agütsütsü atema renemstü asoshi teyari agütsütsü," ta pai ashi.

ketdangsurtem dang linük nung yimdam yimtsüngtem nung temulung agütsütsü mepeshi, kechiyong Covid-19 tanabuba wave item temsemtem ajanga tali akümer. Paisa, tashidak agi kongshir alirtem tendangtsü, lokti nungi pilaa toktsütsü aser temang anepalutsü atema bendanga agüja inyaktsü mepeshi.

"Covid-19 tanabuba wave nung asenoki yimdam yimtsüngtem nem kanga temulung agütsütsü," ta pai virtual senden nung ashi.

Paisa, Covid-19 den raratsü atema vaccine agütsü koda tongtibang iba indang lemsatpba den vaccine dak sendak aliba olulu osangtem ajak raktoktsü atema inyaktsü ayongzüka.

Deobarnü union health ministry-i, yimdam yimtsüngtem nung Covid-19 tashidak menar tali akümba azioktsü atema tetuyuba kar agütsüogo. Tetuyuba nung ASHA workers tem anioktsü benokdanga lir, shirnok India nung Covid wara den raraba mapang yakbang nung nokdakertem lir. Parnoki yimdam yimtsüngtem nung influenza mesükba illness/severe acute respiratory

infections(ILI/SARI) tashidak asadanga alir.

India nung Hombar aser Mongolbarnü nisung lakh asem majung dak dang Covid-19 tashidak potetogo, ajisüaka Mongolbarnü nisung 4,329 süogo, koba anogo ka nung covid agi nisung timtiba asüba asütsü.

Mamata-i Angh melener; PM aser tir dangi shiti zülü

Kolkata, Monupii/May 18 (Agencies): West Bengal Chief Minister Mamata Banerjee-i, Tir aser Ato Kilonser dangi Angh melentsü khanga shiti ka zülüogo.

CBI-i Hombar nü Trinamool lenir pezü apuba sülen lai iba shiti zülü. Lenirtem rongnung minister ana, taoba minister ka aser taoba Mayor ka densema lir.

Trinamool Congress-i Election akokba sülen Angh Jagdeep Dhankhar-i, Mamata-i aniba sorkar kanga rongshia arudar.

Banerjee indang shiti koba Mongolbarnü yok, iba shiti nung lai, Angh Dhankhar-i election tembangba sülen West Bengal nung lendong atalokbatem indang kanga pangsoloka jembidar, ta ashi.

Inyakym ajak ya West Bengal nung temzüng ozüng

Priyanka Gandhi-i UP sorkar aitsü

New Delhi, Monupii/May 18 (Agencies): Uttar Pradesh nung covid tashidak kanga ajema tendangba atema Congress lenir Priyanka Gandhi Vadra-i Mongolbarnü Yogi Adityanath aitsüogo. Lai wave tasembuba atema lenmang mesapoka toktsüba sülen raratsü atema sorkar atar asü masü ta asüngdang.

Allahabad High Court-i, Uttar Pradesh kübok yimtsüng aser yimti tilatem nung medical system ajak joko Tsüngrem taochi ('Ram bharse') nung dang lir, ta ashiba sülen anogo ka lir lia sorkar aitsü.

"Bijnor nung nütsünyongsük lakh 32 shi lir saka anogo nung RT-PCR tests 800 nungi 1,000 shi dang agir. High court ashiba agi, Bijnor amala district nung anogoshia RT-PCR tests 4,000-5,000 agütsüla ajita mesera asenoki wave tasembuba jaoker," ta Gandhi-i Hindi nung tweet asü. "UP sorkar tasembuba wave atema lenmang mesapoka toktsür ang raratsü atar asü," ta Congress general secretary-i ashi.


Lucknow nung pei sasa tenüng asangba sorkar ka amenoka mali asübo 'Indira Gramin Kshetra' nung tatalokbatem repringdangtsü atema merangdang lila, ta



Gandhi-i tanga tweet ka nung ashiba den media osang ka lemsatp. "Tashidaka metendanger, temanga anepalu mesütsür aser medical kit-a mali, ajisüaka sorkari ajak junga dang lir ta ashir," t alai ashi.

State nung quarantine centre tem jenjang aser coronavirus prokshia aoba indang PIL ka angadanga mapang Allahabad High Court-i 'Ram Bharse' olen ya benoka jembiba. Justices Siddharth Verma aser Ajit Kumar na indang high court bench kati, Meerut hospital isolation ward nung yur alisang Santosh Kumar (64) shiba asü, pa indang jembiba mapang iba olen ya lemsatpba liasü.

Gandhi aser tanga opposition lenirtemi Covid-19 tensa achaayangba dak sendakba nung sorkar aija arudar, ajisüaka UP sorkari item taittsüba ka danga magizüker.



New Delhi nung Covid-19 agi kongshir aliba ki makar aser bendanger ayangertem nem chiyongtsü agütsüba noksa nung angur.

bangzüng ka agizüktsü party-i asatpdar, ta ashi.

Mapa belenzükba mapang nungi Angh, Trinamool sorkar den atsütepa arudar.

"Nüburtemi shimba sorkar tamendak dak tashi meiti kümdaktsütsü atema pai temzüng ozüng chirepba indang pangsoloka jembir," ta Trinamool MP Saugata Roy-i ashi.

Ajisüaka Raj Bhavan sources kati Trinamool taittsüba lepa agütsüogo. Nisung kati ashiba agi, Angh ya obendanger ka lir aser pai tashi aser khuret indang ajak angateta lir.

"Temzüng ozüng chirepba indang shisabulua bilemba ya pai shidak dang benokogo. Narada scam nung densema aliba yimden yimsüsürtem obendangtsü atema pai CBI nem temelaba agütsü," ta Raj Bhavan source kati ashi.

Gaza nung Covid lab ka dang aliba raksaogo: Ministry

Gaza City, Monupii/May 18

(Agencies): Gaza nung Covid-19 laboratory ka dang aliba Hombarnü Israel-i bomb pokloktsüba mapang raksar inyaksangshi mesüteti lir ta local ketdangsürtemi ashi.

Gaza Strip kübok Al-Rimal jila nung Al-Rimal clinic ya tera raksa aser kasa mapang nung territory indang health ministry aser Qatar indang Red Crescent office dena bomb agi kongshiogo, ta ketdangsürtemisa ashi.

Ministry nung medical personnel tem yiru aser karbo kanga mejungi yirur lir, ta deputy health minister Yousef Abu al-Rish-i osangbenertem dang ashi.

"Israel-i tanen makai amakba ajanga central laboratory nung tashidak tendangba anenadok," ta pai shisem.

Hopta ka tejakdang Hamas aser Israel na tsüingda mangatetep madok tsüingda Gaza nung ketdangsürtemi anogo shia nisung 1,600 shi dak tashidak tendanga liasü.

Iba mapang positive tests rate 28 percent nung liasü, koba alima nung timtiba lir aser mozükitem nunga shirangertem mesemi liasü.

Gaza nung nütsünyongsük million ana rongnungi 122,000 nem vaccine agütsüogo aser tesadang dak nungi tali tang tashi vaccine mongui lir, ta World Health Organization-i

metetdaksü.

WHO-i ashiba agi, Gaza nung tang tashi nung nisung 103,000 dak coronavirus tashidak potetogo aser nisung 930 süogo.

Kasa mapang nung Gaza health ketdangsürtemi ashiba agi, aonung tepeyong Israel-i tayimtsü amshia amakba sülen Mongolbarnü nisung asüba osang ka danga mali. May 10 nü rara tenzükba sülen tang mezüngbuba nisung asüba osang ka danga mali.

Palestine nungeri Israel dak rocket khaloktsüba-a ayaterem nung tajemba aküm, ta Reuters atema tenük kuli agütsür kati ashi.

Israeli military otondgar Brigadier-General Hidai Zilberman-i ashiba agi, taruba ghonda 24 atema yanglur aliba target list dak ajemdaker parnoki maneni Gaza amaktsü.

"IDF (Israel Defence Forces)-i ceasefire atema mejembir. Onok injang khaloktsütsüba dak dang rangloker lir," ta pai Army Radio dang ashi.

Gaza nung alirtemi Hombar aonung Israel-i 60 ben amakba züingdangtetogo.

Telok anaprongla nungi ketdangsürtemi taoba mapang ashiba agi, Gaza nung ki aser bunkers chirepba nung asürtema kar lir, anungji rara nung asürtem indang osang tejangja magütsüteter.



Israel nungeri Gaza nung Palestine nunger dak amakba anema Houthi busemertemi Sanaa, Yemen nung longkak aita yimtung nung jajadang tangokba noksa ka yangi angur.

Covid den raratsü atema India nem maneni teyari agütsütsü: US

Washington, Monupii/May 18

(Agencies): India nung Covid-19 wara den raraba mapang United States-i lenla balala nung India nem tanen makai teyari agütsütsü, ta White House-i Hombarnü ashi.

Tir Joe Biden shibai India nem USD million 100 alang Covid-19 teyari agütsütsü sangdongogo, pai teyari agütsütsü asoshi asatepba maparen nung kanga nendaka inyakdar, ta White House Press Secretary Jen Psaki-i osangbenertem dang ashi.

"Auh tir-i Covid wara aser iba ajanga India desema alima nung tesem balala koda kongshidar, iba indang süoki ia agidar. Onoki teyari komala agütsütettsü aser agütsütsü iba indang asatepba mapang pai tongtibang shilem agiogo," ta Psaki-i ashi.

India nung Covid-19 tensa indang ashishiba langzüba mapang Psaki-i, India timtem nung aliba mapang United States-i koda teyari agütsütettsü, iba indang maneni inyaktepsü, ta langzü. "Teyari USD million 100 shi

asütsü ta imlar. Onoki India dangi US Agency for International Development-i teyari agütsüba tayimtsü tenet nung yokogo. Tayimtsü tenet nung oxygen concentrators talila densema bener India tongaogo, koba shirangertem atema kanga tongtibang lir," ta lai ashi.

"Onoki maneni lenla balala nung teyari agütsütsü. Tenüingdakba kechi iba indang asündanga alitsü aser wara süngjemdaktsüba nung teyari agütsütettsü imlaa atar," ta Psaki-i ashi.

Bangladesh nung COVID osangbener ka apu



Bangladesh nunger osangbener Rozina Islam, tiyong, ya police temi Dhaka, Bangladesh nung aliba court jati meiner aoba mapang tangokba noksa nung angur. Sorkar indang tongtipang osangtem aser noksa auya, ta tai tonglokja Bangladesh yimtiba nung aliba police temi osangbener Rozina Islam ya Hombarnü apu.

Dhaka, Monupii/May 18

(Agencies): Bangladesh nung coronavirus tashidak ketdangsüba temai adokja osang züluba mechi linük nung tetsür osangbener ka apuba ajanga nisung noklang aikati longkak aiter.

Bangladesh nung timtiba azüingba Prothom Alo osangkaket indang bushisüingdanga osang zülur/abener (investigative journalist) Rozina Islam ya Official Secret Act kübok Hombarnü apu, ta police temi ashi.

Iba act kübok health ministry indang document tem auyiba ken o nung la Mongolbarnü okadak nokdak. La indang ken o ya ano Brehostibarnü jembitsü.

Sorkari ochimashi mapa

inyakba temai adoktsüba atema nüburtemi Rozina Islam ya kanga junga meteta lir, aser iba ken o nung la aitsüra tepuokdak küm 14 ayutsü mesüra tasüba temerenshi angutsü akok.

Coronavirus agi timtemba mapang osangbener anema inyaksangshiba tali akumer, ta rights group aser media watchdog temi ashir aser arishi küm 42 tain yua aliba Dhaka police station-i osangbener noklang aika oa liasü.

Committee to Protect Journalists ajanga Islam ya tangsa chioktsüla, ta takangba agütsü. "Bangladesh ketdangsürtemi osangbener ka pua colonial mapang yangluba ozüing ka kübok ken o benokba angashia onok aoksar.

Bangladesh police aser ketdangsürtemi Rozina Islam ya osangbener aser nüburtem tenzükba mapa inyaker ta angatetsüla aser la anema ken o benoka aliba agiener la chioktsüla," ta CPJ indang senior Asia researcher Aliya Iftikhar-i sangdong ka nung ashi.

Sorkari tashidak wara ketdangsüba indang lai osang abenba ajanga apu, ta longkak aitdak osangbener lenirtemi ashi.

Lai züluba osangtem rongnung tang rongdak amshitsü medical osettem Dhaka airport nung ita aika mashishi yutsüba, health ministry nung doctor shimtsü atema süpokrem amshiba dena liasü.

"Lai züluba ajanga coronavirus mapang nüburtem kumzüka ayutsü temeden ministry ajanga mamshitetba indang temai adoktsü," ta Law and Mediation Centre group ajanga ashi.

Bangladesh nung coronavirus agi nisung 800,000 jungnüa menepogo aser nisung 12,000 shi süogo, saka mongintemi iba osang ya tabensa masü, ta ashir.

Iba tashidak wara tenzüker Bangladesh nung osangbener 85 shi anema 2018 küm yangluba ozüing kübok ken o benoka lir, ta UN rights consultant Rezaur Rahman Lenin-i ashi.

Samoa nung ato kilonser tetsür mezüngbuba shimogo



Fiame Naomi Mata'afa

Apia, Monupii/May 18

(Agencies): Samoa nung election ya tang tasen masü, tetsür ato kilonser mezüngbuba shimtetogo, aser nisung 200,000 aliba Pacific asetkong

Hombarnü Supreme Court ajanga April ita election nung Fiame Naomi Mata'afa-i takok anguba medenja, hopta aika yimten-yimsüsüba nung atsütepa aruba aser election tanaben agishitsü ola adokba anenogo.

Lai alima nung ato kilonser talangtiba inyaker jenjang tanabuba nung alisang, Tuilaepa Sailele Malielegaoi atsüingdok, shiba 1998 küm nungi linük nung yimsü süa arua liasü.

Samoa nung democratic election ya tang tasen masü, saka alimai metettsüsa mangatetep madoker.

Iba linük nung Human Rights Protection Party (HRPP) ya dang liasü aser parnoki tesüiba küm 40 tashi election agiba ajunga nung takok ngua aru. Aser teburi dang yimsü süa aru.

Saka taoba küm HRPP telok nungi züingsem kar mejetzüka oa opposition Fa'atuatua i le Atua Samoa ua Tasi (FAST) party ya tentet.

Aser FAST nung January ita Fiame Naomi Mata'af oa adenba sülen par telok nungi ato kilonser atema tokteper nübu tejangja akum.

(Maneni tapak 9 nung...)



Hollywood (Florida), Monupii/May 18, 2021: Deobar (16.05.2021) aonung Hollywood, Florida kübok Seminole Hard Rock Hotel & Casino nung 69buba Miss Universe Competition sentong agiba mapang 'Miss Universe 2019' Zozibini Tunzi-i 'Miss Universe Mexico 2020' Andrea Meza nem takok korang semoktsüba noksa ka yangi angur. Mexico tsür Meza, shibai software engineering degree ajangzüksetta lir, Miss Universe tetoktepba sentong nung linük balala nungi shilem agir kongrü 73 madak lai takok angu.

'MTV Movie & TV Awards 2021': 'WandaVision'-i award timba angu

Washington, Monupii/May 18, 2021 (Agencies): Deobar aonung 'MTV Movies & TV Awards show 2021' sentong takok ngua agiogo. Iba award sentong nung Disney+/Marvel Studios' indang sitcom - 'WandaVision'-i award timba angu. Taküm '2021 MTV Movie & TV Awards' sentong ya Leslie Jones-i ketdangsüa (host) agi.

Iba sentong nung Elizabeth Olsen indang 'Wanda Vision' ajanga best series aser best performance densema award pezü tashi ngua liasü.

'The Hollywood Reporter' sangdong ka ajanga angazükba agi, iba sentong nung takok angur tenüngtem Los Angeles kübok Palladium tesem nungi live ajanga metetdaksü.

Iba sentong nung 'WandaVision' atema Olsen-i award nguogo. Kasa mapang sentong nung host - Jones-ia 'Coming 2 America' atema award agizük.

'Ma Rainey's Black Bottom' atema asür Chadwick Boseman nem best performance nung award agütsü (posthumous). Iba mapang teloki pei pei mena aliba menden nungi noktaka aser teka madena Chadwick nem tenüngsang agütsü.

Kasa sentong nung Chase Stokes aser Madelyn Cline nati Netflix indang 'Outer Banks' atema award angu. Victoria Pedretti-ia 'The Haunting of Bly Manor' atema award nguogo.

2021 MTV Movie & TV Awards takok angurtem:

- Best Movie 'To All the Boys: Always and Forever'
- Best Show 'WandaVision'
- Best Performance in a Movie Chadwick Boseman, 'Ma Rainey's Black Bottom'
- Best Performance in a Show Elizabeth Olsen, 'WandaVision'
- Best Hero Anthony Mackie, 'The Falcon and the Winter Soldier'
- Best Kiss Chase Stokes & Madelyn Cline, 'Outer Banks'
- Best Comedic Performance Leslie Jones, 'Coming 2 America'
- Best Villain Kathryn Hahn, 'WandaVision'
- Breakthrough Performance Regé-Jean Page, 'Bridgerton'
- Best Fight Elizabeth Olsen vs. Kathryn Hahn, 'WandaVision'
- Most Frightened Performance Victoria Pedretti, 'The Haunting of Bly Manor'
- Best Duo Anthony Mackie & Sebastian Stan, 'The Falcon and the Winter Soldier'

Samoa nung ato kilonser tetsür... (Tapak 8 nungi...)

Arishi küm 64 tain Fiamé Naomi Mata'af ya 1980s mapang nungi yimtenren nung shilem tajung agia arua Polynesia indang tetsür deputy prime minister mezüngbuba akum aser iba region nung sorkar tekolakba inyaker tetsür tanabuba akumtsü.

Mata'afa tezü ya bushia aonung yimsüsür kibong den sendaktepa lir, aser iba linük nung ato kilonser mezüngbuba'er jala lir.

La election nübuyim ajanga Samoa yimtenren yimya khenyongi melen.

Lai nüburtem lar kidangi jaoka sensaksem aka aser o intepa liasü aser kobi melie linük tesem balala sema jaja vote agütsürtem den indang indanga jembia liasü.

Lar teloki menden 25 angu aser HRPP telokia kasa ngua liasü, saka independent MP ka yimten yanglur akum, shiba FAST nung adentsü liasü.

Saka iba sülen tepenja adok. Samoa nung MP shilem

10 tetsür asütsüla, ta ozüng lir, saka tan election nung tetsür MP pongu dang shimteta menden 51 aliba nungi shilem 9.8 dang ajung.

Election commission ajanga tetsür MP ka bendenloktsü, shiba HRPP nungi liasü. FAST teloki mepelai ola adokaka meden 26-26 kumadok aser tetsür züngsem timba kumdahtsütsü atema bendenloktsüba agi linük nung ato kilonser tetsür mezüngbuba inyaksü aliba nung tetsükdaksü ajuru.

Court nung ken o balala benokaka, election commission ajanga April election result magizüki May 21 nung election tasen agitsü sangdong.

Saka election agitsü anogo pongu dang lia, linük indang Supreme Court ajanga tetsür menden ka bendenlokba aser election tasen agitsü aliba anema obendang agüja Fiamé Mata'afa yagi otsü yanglutsü maongka angu.

ONOKI KANGA MEIMBA OJALA



May 16, 1938

May 15, 2021

**Lt. Mrs. T. Maongsangla Imchen
Wife of Mr. S. Imkong Longkumer (Lirmen)**

Onoki teti meima aliba ojala asür T. Maongsangla Imchen, la mapang tatsüka shiranga alidang aser May 15, 2021 nü iba akümüli toktsür orr onok mangyim jashi nung aliba mapang, Kija, Medemerterm, Kiyongertem, Arogo balala, Tentettem aser Temulunger kwinkati shisatsü, nübu, rongsen aser metitemi sarasademsüba ajanga ozü dang masadangtetba temeim tulu sayuogo, nenok ajak dang asür kinungertemi temulung taroktiba nungi pelaba lemsateper.

Onoki item nübu aser tentettem dang alakteta pelaba shisemer:

1. Shri. Temjen Imna Along, Hon'ble Minister Tribal Affairs & Higher Education, Nagaland, Kohima.
2. Dr. Yanger Aier
3. Dr. S. Apong Longchar
4. Dr. Rongsenangla
5. COVID-19 Dimapur District task force
6. COVID-19 task force, Lengrijan
7. DABA, Sümedem Fellowship

Nenok kija shia tenüng teta ozüi pelar ta meshitetba atema sasa bilemer, saka ozü asükhu mapang nenoki aria bilemja aser mapa tajung agi nungita yaribatem teti bilemtetsü.

Nenok mapa tajung asoshi, Tulusang Tsüngremi nenok ajak molamushia moajangma.

- TEMEIM KINUNGBO, CHIRNURTEM, ANÜK-APANGTEM, SEMCHIRTEM ASER KINUNGERTEM

Triple Camera aketba Realme Narzo 30 saya

New Delhi, Monupii/May 18, 2021 (Agencies): Realme-i brand indang Narzo 30 series nung smartphone tasen ka - Realme Narzo 30 bendenlokba sangdongogo. Iba model tasenba ya Narzo 30A aser Narzo 30 Pro nung adentsü, koba taküm February ita sayaa liasü.

Realme Narzo 30 smartphone ya Malaysia nung mezüng ayoktsü; ajisüaka Realme India CEO Madhav Sheth-i sangdong ka ajanga, iba smartphone indang 4G aser 5G variant anaprongla India nung yakta sayatsü ta metetdaksü.

Company ajanga iba smartphone India nung sayatsü asoshi anogo tejangja ka magütsü. Iba smartphone tesülen design ya taoba model dang nungi balaka alitsü. Iba smartphone tesülen camera module ya rectangular design den sentsü tanak alitsü.

Realme Narzo 30 4G nung 6.5-inch LCD display den Full-HD+ resolution, 90Hz refresh aser peak brightness 580 nits inoka yanglutsüogo. Iba phone display panel nung hole-punch cutout ka keta lir, kong selfie camera ka angutsü. Phone telung nung octa-core MediaTek Helio G95 processor den ARM Mali-

G76 GPU, 6GB RAM aser 128GB storage inoktsüogo.

Android 11-based Realme UI 2.0 ajanga phone maparen achaayangtsür aser dual-SIM card amshiteter. Iba phone tesülen triple camera setup nung 48-megapixel primary camera, 2-megapixel monochrome sensor aser 2-megapixel macro shooter ka angutsü. Selfie aser video calling atema phone tejaklen 16-megapixel camera dena lir.

Tesülen primary camera yagi 30fps nung 4K video tem tangoktetter. Ano külen, tejaklen camera yagi 30 fps nung Full-HD video tem tangoktetter. Narzo 30 nung battery tasazük 5,000mAh alitsü aser 30W Dart Charge ajanga charging karadaksür.

Tanga feature tsütsü reprangdangra, Narzo 30 nung 4G, dual-band Wi-Fi, Bluetooth v5.0. GPS, side-mounted fingerprint scanner aser NFC angutsü.

Realme Narzo 30 ya 6GB RAM + 128GB storage variant nungang angutsü aser iba variant jenjang RM 799 (sen 14,200) alitsü. Malaysia nung company-i iba phone atema introductory price offer agütsütsü terenemba lir aser device ya Racing Blue aser Racing Silver sentsü nung angutsü.



May 17, 2021 nü Assam Rifles purtemi Shamator town tesem balala nung Covid-19 agi jebua alitsü atema mozü agi merüktetba yangi noksa nung angur. (IA Shamator)

India cricket team anaprongla England-i külemi aotsü akok



New Delhi, Monupii/May 18, 2021 (Agencies): India tebur aser tetsür cricket team anaprongla pei pei tata series asayatsü atema charter flight ka nung külemi England-i aotsü akok.

Parnok England-i maodang, hopta ana quarantine asütsü atema, May 19, 2021 (Mongolbarnü) team anaprongla Mumbai nung adenshitsü akok. Anüolen India tsütsü yipru (Tauktae Cyclone) ajanga timtem adoktsü akok ta Hombar anogo asadanga jembia liasü.

England-i maodang, Mumbai nung National cricket team anaprongla adenshitsü atema Board of Control for Cricket in India (BCCI)-i May 19 aser May 24 - anogo ana latetja lir.

June 18, 2021 nungi tenzüka India tebur team-i New Zealand team den World Test Championship final nung Test match trok asayatsü aser iba sülen August 4, 2021 nungi England den parnoki Test pungo asayatsü.

Ano külen, June tom ka nung India tetsür team-i England tetsür team den Test ka, ODIs 3 aser T20Is 3 asayatsü terenemba lir.

ESPNcricinfo.com sangdong ka ajanga angazükba agi, "Test squad nung dena alir asayar 20 nungi Mumbai nung alir asayatem dak alaka, tanga tesem balala nungi arur asayar ajak Bodhbarnü (May 19) nungi tenzüka team hotel ka nung quarantine asütsü."

"Captain Virat Kohli, pa den tayariteper (deputy captain) Ajinkya Rahane, Rohit Sharma aser head coach Ravi Shastri densema Mumbai nung alir tanünga squad aser team management indang züngsem ajak May 24, 2021 nungi Mumbai team hotel kübok bio-secure bubble nung amungtsü," ta kasa sangdong nung shia lir.

England-i ayamesoa maodang team anaprongla anogo 10 tashi quarantine' asütsü.

Taruba ita India tetsür cricket team-i England nung Test ka asayar sülen, Australia nunga parnoki Test ka asayatsü renema lir.

India tetsür team, shirnoki küm tenet nung taküm June 16 nungi England den mezüng Test asayatsü, iba tour mapang parnoki ano Australia den asayatsü. Test den külemi parnoki ODI aser T20I match asayatsü.

2006 küm India tetsür team-i Australia den tesüsa Test Cricket asayaogo.

Australia tour atema osang magütsü, saka Australia tsür fast bowler Megan Schutt-i ashiba agi, iba series ya taküm September tom ka nung asayatsü renema lir.

UEFA - CL Final lapokba sentong nung Marshmello-i shilem agitsü



Monupii/May 18, 2021 (Agencies): Pepsi ajanga achayangba UEFA Champions League Final lapokba sentong nung nungtuju DJ Marshmello-i yimya balaka nung shilem agitsü terenemba lir.

May 29, 2021 - Honibarnü, UEFA Champions League Final masayadang, DJ superstar, Marshmello-i technology tasen temeyoktep amshia virtual ajanga minute trok agia shilem agiba angutsü.

'Happier' music yanglusang Marshmello-i ashiba agi, "Taoba küm dang nungi taküm ya balaka lir. Saisapong, Music aser entertainment tem meyoaktepa fans nem tajangshiba balaka agütsütsü renema lir. Kü sempet ajanga tangar peladaksütsü asoshi shilem agitsü maangka tulu agütsüba atema Pepsi aser UEFA naprongla dang pelaba metetdaksür."

Iba nungtuju saisapong sentong nung shilem agitsü asoshi osang sangoktsütsü atema, Marshmello-i video ka ajanga tasa balala lemsatepogo. Soccer nung tongtibang

nübu Leo Messi, Paul Pogba aser Jadon Sancho aser Now United band züngsemtemi iba sentong nung Marshmello jaoktsü mulungtepa liasü.

PepsiCo indang Vice President, Marketing, Global Beverages, Natalia

Filippociants-i, "2016 küm nungi UEFA den longjemer Pepsi-i iba asaya Opening Ceremony atema sabang agüja arudar aser taküm-a iba show jenjang balaka nung agitsü renemdar.

Entertainment tsütsü Pepsi ajanga nungita arudar. Stadium nung terepranger ishika dang liaka, parnok peladaksütsü imlar. Taküm UEFA Champions League final tenzütsütsü asoshi Marshmello ya artist tetemjen ka asütsü, koba football jangrar den külemi alima ajanga nung music sapurtem tali dang atsüa arutsü," ta ashi.

Marshmello dak alaka, tawa Dutch DJ Martin Garrix-i UEFA Euro 2020 ken, 'We Are The People' sayaogo. Iba ken nung U2 indang Bono aser The Edge dena lir.

Wriddhiman Saha India squad nung adentsü

New Delhi, Monupii/May 18, 2021 (Agencies): Wicketkeeper-batsman, Wriddhiman Saha Covid-19 tashidak nungi taneptsü nguogo aser taruba ita England Tour atema pai India squad nung adentsü terenemba lir.

Delhi kübok hotel ka nung hopta ana dak tema quarantine nung amungba sülen Saha pa talidak Kolkata tongogo. Pa Covid-19 wara nungi taneptsü anguba sülen England tour nung shilem agitsüpur külem squad nung pa züngokogo.

Tawa thitemtsüba Indian Premier league asayamung nung

SunRisers Hyderabad tenüng nungi shilem agiba mapang, iba tesashi wara puteter asayatem rongnung arishi küm 36 Saha dena liasü.

"Delhi kübok hotel ka nung hopta ana ser tesadangka quarantine süa mungser sülen yashi pa (Wriddhiman) talidaki meyipa aruogo," ta otongdar sangdong ka ajanga metetdaksü.

Mumbai kübok "pre-departure bio-bubble" nung madandang RT-PCR test nung Saha dak iba tashidak maliba (negative) sayutsüla. England-i ayamesoa maodang, iba bio-

bubble nung squad nung dena alir züngsem ajanga hard quarantine asütsü.

Southampton kübok June 18, 2021 nungi tenzütsü aliba World Test Championship final nung India-i New Zealand den asayatsü terenemba lir.

Ano külen, England den Test series pungo ya August ita asayatsü.

Tesüiba anogo pezü coronavirus test ana tashi nung Saha dak iba wara aliba tendangtet. Ibaji ajanga pa mapang agia quarantine asütsüsa aküm.

Tokyo nung doctor temi Olympic masayadaksüner

Tokyo, Monupii/May 18, 2021 (Agencies): Tokyo Olympics tenzütsü ita asem dang lia, Japan nung nübur tsüngda coronavirus tashidak putetba ajanga hospital tem nung timtem/khuret tali küma aoba asadanteta, medical tentet kati iba Olympics asayamung athitsü asoshi takhangba agütsüogo.

Tokyo Medical Practitioners Association nung doctor 6,000 dena lir aser Games ayongzütsü aliba yimti - Tokyo kübok mozüki balala nung iba wara agi shiranger jenti anepaludaki aser tashidak puteter timba kümra, shirangertem yaritsü/anepalutsü asoshi nübu (doctor) peria mali aser onok tashi agi menanzüktsü, ta parnoki ashi.

"Olympics ayonga asayatsü timtem asütsü aser iba Games thitsütsü asoshi IOC (International Olympic Committee) dang ashitsü onoki

tekolakpurtem dang mepishir," ta May 14, 2021 nü iba tentet ajanga Ato Kilonser, Yoshihide Suga dangi yokba shidi nung shia lir.

Japan yimti Tokyo kübok tesem kar nung medical staff aser mozüki nung yipden peria maliba mapang ka nung nisung aika dak coronavirus tashidak menatepba ajanga nübur aoksataper. Iba tensa asadanga, May 31, 2021 tashi Tokyo aser Japan kübok tesem kar nung Sorkari 'state of emergency' tasembuba atsülangtsüsa aküm.

"Covid-19 wara agi shiranger anepaluba/reprangba medical rejutem nung medical staff tem mazüngi inyakdar aser tashidak puteter timba kümra parnok anepalutsü asoshi doctor aser takdang peria mali," ta medical tenteti züluba shidi nung shia lir.

Tsüklawa mongpu mapang, manemertem/shirangertem anepalutsü aser Olympics ajanga wara timba kümdakja tasüba ajurutsüsa tensa kati

arura Doctor tem timtem talila ajurutsü. Item khuret ajungaji Japan-i dang abentsü," ta parnoki shia lir.

Tanga health takotet aser medical telok temi Olympics ayonga asayatsü sentong dak sendakba nung teblemstü balala adokba ashishitepogo. Kasa mapang, iba Games thitsütsü asoshi Japan nung nisung meyisa meyi agi online petition nung sign süogo.

Alima tesem balala nung Covid-19 wara agi kongshir alir tanga linüktem den medemdanra, Japan nung iba wara kangarabo tamajungba modaktsüi azüokteta lir, saka vaccine agütsütsü mapang agiba ajanga nüburtemi sorkar inyakyim sashia aitsüogo.

Reuters sangdong ka ajanga angazükba agi, Japan nung nütsüng yongsük shilem 100 nungi shilem 3.5% - million 126 nem dang vaccine agüja lir.

Vaccination dak sendakba

nung asadanga, Hombarnü Tokyo aser Osaka nung nübur ajanga Vaccine agitsü mekaa ayutsü/tenüng agütsütsü atema maparen tenzüksüogo, saka techincal inyakyim tsütsü mepetmesü adokba ajanga iba maparen nung junga metenzükteki lir.

Ajisüaka, Ato Kilonser, Suga-i ashiba agi, COVID-19 containment mera takang nung anidaka Japan-i Olympics asayamung ya takok ngua ayongzüktetsü akok.

July 23 nungi tenzüka August 8, 2021 tashi asayatsü aliba Tokyo Games atema COVID-19 temzüng takang nung anidaka renemshidar. Coronavirus wara süshia maoba ajanga, taoba küm iba Games

asayatsü atema khen anogo atsülangja lir.

Tang, Asia linük timbaka nung coronavirus wara mejungi aoba ajanga, Hombarnü World Economic Forum-i küm shia ayonga agiba senden thitemtsü. Iba senden ya August ita Singapore nung agitsü renemer liasü.

Japan indang tesem kar nung 'state of emergency' kübok bar, restaurant, karaoke parlour aser yi ayokba dokantem shibangtsü, ajisüaka mapang tatakzük atema shishilembaba tesemtem lapoktsü akok. Kasa mapang Covid-19 wara agi kanga mejungi konghiba tesem - Tokyo aser Osaka kübok tesem timbaka maneni shibangtsü.

BILEMDANGANG

"Aibelenadoker sasatepdang nungibo matalokjongi ozüng kübok alitsü merangang."